

鎮坪縣鄉土志

中華民國



月二十六日

中華民國二十六年十一月九日



鎮坪縣鄉土志目錄

邑人劉式金幼賓編次

卷之一

星度第一天象肇徵人事攸垂代有五掌莫之或廢

地理第二山川幽阻所麗實弘關梁禁詰民生治原

建置第三明季而上人空地塞清乾嘉朝漸事邊要

祠祀第四國之大事在祀與戎民視民聽服教奉神

卷之二

36801



賦役第五田賦身役國之要政汚吏黠民轉展低昂  
人物第六國於天地賴人以立明德達才間世而生  
選舉第七官師教化治術攸關涵濡默運計在百年  
物產第八民財民力與物推移開殖有道富強可待

卷之三

風俗第九人情習尚與時變化端視士夫相為轉移  
兵歲第十妨民之事惟歲與戎如何而可老死弗聞

鎮坪前為平利縣丞分駐要鎮也向無考平利續修縣志時凡  
屬在此者又置之弗聞以故事不多見宣統元年縣丞楊文濂  
奉檄限纂鎮坪鄉土志以備陝西憲政編查館暨通志局採輯  
之用時布衣王子葆卿蓋嘗述之余從而讀之竊謂限制弗嚴  
考核弗精非志法也民國五年張縣佐世垣先後延請邑宿賴  
子子麟吳子顯齋更番修輯其書雖未覩然大匠繩墨必有家  
法悉合志體惜司存掌故弗嚴歸烏有矣余適在籍為先母守  
墓樹臣袁邑侯謬采虛聲詔充陝西通志鎮坪縣採訪主任限  
日先送鄉土志以聞於是卒成三先生之志畧序撰之起於可

考託於勝清都為三卷凡十篇以俟當代君子鑒定而採擇焉  
應相忘余荒陋而弗文也矣民國十二年癸亥八月朔弁端

卷之一

星度志

天象肇微人事攸垂代有主掌莫之或廢  
述星度第一

舊興安州志曰天文家云井鬼右四星屬川西左四星屬全秦  
諸郡縣平利文興安界實量八十里鎮坪西北琉璃壩交平利  
界實量一百二十六里該處至平利城實量又一百二十六里  
合之去興安都四百一十有二里余曰星之分野應與蜀之巫

溪原名大寧

楚之竹谿得比例焉考四川夔州府各縣分野翼

軫湖北鄖陽府各縣如之我邑位夔與鄖之中星分翼軫當無  
疑義按平利志分野井宿兼翼軫平利去興安近故井宿兼翼  
軫我邑去平利遠去巫溪竹谿近故曰居翼軫無疑姑述於此  
以俟專門博士而考證之

按平利志光緒十七年奉部飭各縣實測度數我邑於大暑節  
後十一日測鎮坪城求得北極出地三十一度五十四分五十  
四秒測太陽高弧七十五度三十六分零六秒減距度十七度

三十一分除象限九十度實得北極出地度又測鎮坪城得經  
度三十一度五十四分五十四秒緯度偏西五度四十三分十  
二秒又測邑西北鄉發龍山交平利界得經度三十二度二分  
十五秒得緯度偏西五度五十分二十秒又測邑東南鄉雞心  
嶺交竹谿巫溪界得經度三十一度四十九分三十秒緯度偏  
西五度四十分

余兒時恒記夏酷暑至銅壺漏盡炎威不退弗克安寢冬奇  
寒必擁衾圍爐不敢外出仲冬之月雪恒深沒脛少年喜事  
者往往撮雪獅雪人於街心逾月不溶當時氣候流行於此  
可見自光緒庚寅高山洋芋壞後人民流亡一空夏月從無  
大熱冬時亦不大寒雖癸巳冬漢水冰結斷流我邑亦不十  
分過冷滇人盛稱其地之氣候融和云四季無寒暑一雨便  
成秋鎮坪近三十年彷彿似之附識之以資考證

地理志

山川幽阻所麗實弘關梁禁詰民生治原  
述地理第二

鎮坪在興安府東南廣人里一百一十三里鳥里四十六里縱  
人里一百二十六里鳥里七十二里東至界嶺子交竹谿西面

河界實量十九里西至平溪河亮風埡交平利界實量一百里  
南至中茅壩中心石交巫溪一碗泉界實量五十六里東南至  
雞心嶺交竹谿巫溪界實量三十二里西南至大榆河兩扇門  
交四川城口（原太平分出）界實量七十四里東北至竹葉關交  
竹谿關埡子界實量一百一十里西北至琉璃埡交平利界實  
量一百二十六里由鎮坪至京師陸程三千七百四十五里至  
省陸程一千二百六十里至府陸程五百六十里實量四百一  
十二里至平利縣陸程三百六十里實量二百五十二里我邑居

羣山萬壑中碉墩關梁隨在皆是其山最高者東有乾洲河之  
山東坡三隻眼亮埡子仰天窪西有平溪河之灰堆河亮風埡  
南有中茅壩之中心石北有竹溪河之發龍山靈官殿又東南  
有下茅壩之雞心嶺西南有大榆河之兩扇門大梁東北有竹  
葉關之關埡子大梁西北有馮家營之浪河腦東西二河腦上  
述諸山均高挿入雲渺不可攀俯視諸山直如兒孫繞膝擁護  
目前其脈以發龍山為祖右幹走石門溝原梁迤南經容村河  
大梁由此中伸一支左夾竹溪河右夾澍河送出竹溪河口止

又由客村河大梁迤南經灰堆河腦過亮風埡偏東經戴安河  
大梁至兩扇門其左一支伸出為小澍河之陽其右一支伸出  
為小澍河之陰陰也陽也夾送其流至青雲觀而止又由兩扇  
門迤東經大小榆河大梁其左一支伸出為三茅壩至城南羅  
漢洞蜿蜒而下至澍河口之安福寨而止其右一支由軍口伸  
出至貓子廟而止又由大小榆河大梁迤東至中心石其下為  
中心場又東至雞心嶺更東經楚地蔡子壩原梁不五里下即  
緣溪關由此轉東過小關其下有舊瓦子坪汎在焉又東轉經

仰天窪過界嶺子其左伸出一支至石門子而止其陰即石門  
坪之老街在焉其右轉北經山東坡三隻眼馬鞍山其下縣城  
在焉又北經亮埡子龍家坪其下有古文彩關在焉又北經漆  
松黃草山磨子坪過關埡子經五尺溝大梁過花園至天坑峽  
為出境處右幹由靈官殿經黑壩迤西經劉家台經卓家坡其  
下有永興場在焉又迤西經太平坡舒曲而行經金子台經小  
溝經白土嶺經白硃峽經老莊子經柿樹溝經新寨子由此至  
浪河腦又西北經琉璃埡經千山夾南江河至天坑峽出鎮坪

境其水之最長者有源二一出分水嶺在上曰大榆河是一出  
雞心嶺在下曰茅壩河是二水各流或百里或四五十里至貓  
子廟為一西北流二十里至鎮坪城西乾洲河注之又西流二  
十里澍河注之復西北流十里竹溪河注之又西北流五里石  
砦河注之匯流至此乃名曰南江河查南江河實堵河第一正  
支其他恐無此澎湃急湍也復西北流七十里大小湖溪之水  
注之又三十里竹葉關之水注之又北流五里浪河注之又北  
流五里百忍溝之水注之又北流十五里至天坑峽出鎮坪境  
是水之在鎮坪也流三百里無一利賴滅頂之耗時有所聞利  
非不可興如有鉅款鑿通洗沙灘白硃峽天坑峽磷磷之可憎  
可惡者一旦舟船往來轉運稱便雖蕞爾山國未始不可與通  
都大邑相牟奪焉其他支流之源又不可不志也如乾洲河源  
出五眼水東南流至水岔口其東皮風溝其東南天窩塢之水  
入之流至城西入正河又大澍河之源有三一出灰堆河一出  
亮風壩一出戴安河西北流至漁蓬子南客村河之水入之迤  
北林河之水入之始名曰大澍河仍西北流至青雲觀小澍河



之水入之仍西北流十里入正河又小澍河源出螞蝗壩至青雲觀入大澍河又竹溪河源出發龍山流九十里至塘房入正河又石砦河源出亮埡子流三十里至太極山入正河又浪河源出大小東河大小西河太平河椒陽河諸水注之東流入正河所謂正河者即南江河之簡稱也其關四曰緣溪關當湖北四川兩路曰小關（即瓦子坪之小關子）當湖北西溝一路曰文彩關當湖北石墊河劉家坪唐家坪各路曰竹葉關當湖北黑兔坪王二壩各路皆形勢阨要險峻羊腸真一夫當之萬夫色

變所望有人民之責者無忘設關守國之義可也其卡八東鄉西面河界嶺子東南鄉雞心嶺南鄉中心石西南鄉兩扇門西北鄉牙河口西鄉牙河腦北鄉竹葉關東北鄉琉璃埡前縣丞按月賚造以領經費名曰緝捕經費他無論矣而四川之兩扇門中心石雞心嶺湖北之關埡子界嶺子等處每月定與隣省各廳縣互換哨票一次並出與印結城口巫溪竹谿各廳縣賚此縣丞印結以憑領款鎮坪縣丞則聽書吏捏造按月呈報各大憲塞責而已實無一次親履其卡與隣省各廳縣親會一面

噫清季吏治之壞此其一也亡國之漸類基於此其以木為梁者二澍河口竹溪河口經久可靠有專款有專人專理其事行之數十年未聞有誤行李其造舟為梁者七城西一響水灘一石砦河一古里渡一乾坪上下渡口各一水心坪一均可經久不致廢弛惟賴地方紳耆時加考察庶或不致留難行人事出意外其以人力建碕而防暴亂者緣通衢無之天然生成之巖山碕墩可據以捍外侮者緣通衢無處無之關也梁也碕也卡也固足以防姦緝暴然任非其人雖有陰平之險劍閣之雄何益於人國哉

其他名勝古蹟雖無關治理要不可不詳以俾邑之人善自領畧而興感焉

錄賴子子麟名勝古蹟述說並前縣佐張公漢京記事詩如左

### 山城曉霧

鎮城羣山環繞兩水夾流地誠磽确氣覺清淑每於久雨新晴  
凌晨濃霧瀰漫窳罩半空俯不見地仰不見天俄頃烟消日出  
恍如牛渚西江誠瑞氣也

古刹晨鐘

城之南渡溪半里許為羅漢洞形如蹲獅舞球狀不知何時建  
玄天宮於叻中松柏陰翳山翠襲人於殘月啣山晨星當戶時  
鯨音嫋嫋不絕散入城中若聲自雲端來黃梁夢醒令人心神  
俱爽萬慮全消

山環大極

城西五里之挖斷岡南北山麓各伸長股高數十丈下山上迎  
上山下送彎環曲抱成太極形而又溪流滌洄隨山貫注如太  
極之判兩儀者語云山川毓秀信然

石吐龍泉

城東二十五里地名五眼水丹巖壁立五洞中開水泉自石湧  
出晶瑩澈澈如銀河倒瀉所謂在山泉也下則成溪汪洋澎湃  
即乾洲河源

虹橋跨峽

去鎮城一百五十里之天坑峽嶺上陝鄂分界處下則怪石巉  
巖人跡不到為全鎮關鍵南江河注此匯成巨浸每於雨消新

晴登高遠眺彩虹自峽中出綿亘半空與日光相激射五彩繽紛爽心奪目雖長橋卧波未足以喻其妙誠奇觀也

### 雪城橫空

城南九十里發龍山為漢水以南羣山之鼻祖橫亘天末高插霄漢當隆冬瑞雪時為南北風相衝擊結為堅城高或數丈長或數千百丈不等每屆春暮午前日力勝風則雪消午後風力勝日則冰結樹着冰如瓊樹冰射日如玉山其晶瑩璀璨真天上白玉城也

### 神倉玉米

平溪河羣山中有古洞內產碎玉堅潔非常或圓或扁或長肖五谷形色亦各從其類惟粲粲者尤佳亦異產也

### 仙洞金聲

雞心嶺下十里丹巖絕壁中有洞名朝陽深邃莫測相傳為仙人所居探勝者必攀巖越壑而後達洞口軒豁有石柱二均高五六尺下濶上銳而頂微圻注油燃之若天然兩燈檠也入後偃偻行數十步忽焉開朗天光從石窗射入縱橫約十餘丈下

平如砥上懸石鐘外圓中空巨細不一以外有若玉磬若銅鈺  
若鼗鼓祝啟諸形者擊之清越澹遠鏗鏘無不清濁高下各肖  
其形惜無人審其音韻定其節奏以譜霓裳之雅調耳

荷生前三日劉君幼賓招飲朋輩於羅漢古洞醉歸賦此

記事

巉巖張口如怒獅中有蘭若撐嶺巖突兀傲岫江之涓伏暑人  
來消夏宜使君好客性不羈招來湖海豪士奇佛堂仙洞足涼  
颺談空說有開心脾白也後至何遲遲李石獨後入門一笑拂

新詩撫時感事寄遐思快覩爭先如渴饑須臾合座興淋漓朱  
虛酒令嚴指麾每人先飲十大卮然後梅戰分雄雌肴核紛陳  
七箸施壺觴引至傳敢辭初筵溫恭不愆儀既醉號呶舞且傲  
科頭跣足坐踞箕瞥眼雲捲山轉移有心擊磬學宣尼一鼓作  
氣寧竭衰仙人戲蟾酣跳攷無端納履匿下邳老大也得兒童  
嬉人生樂事非等夷我心煩渴不自持探喉格格涎漣沔睡醒  
啞然還自嗤夢裡喃喃呼醴醅夕陽在山遊興疲禽鳥倦還暗  
笑窺紀此勝遊妙解頤安得生花筆一枝

余常聞地方長老云鎮坪自元始已空無人平利管至白硃  
峽止以上名。南山老林按平利志載洪武三年屬四川大寧  
五年移建於今之舊縣正德中增設巡檢駐鎮坪尋改屬陝  
西省興安州云或曰平利屬興安州後鎮坪一隅則仍屬四  
川大寧所駐巡檢尋即裁去或又曰張獻忠自此竄平利按  
平利建置志載崇禎七年六月流賊張獻忠等自蜀還楚盧  
象昇督將士由竹谿至平利之烏林關十餘戰大破之以今  
考之自蜀還楚至平利舍鎮坪無行軍之路可由蜀至竹谿  
今竹谿赴大寧運鹽者道必經鎮坪其明證也道光四年鎮  
坪設縣丞益白硃峽馮家營竹葉關百忍溝水心坪五保歸  
縣丞就近管轄以余揣之正德中所設巡檢裁去之後非已  
空無人即不屬平利轄地二者必居一焉又據土人云文彩  
黃草山常有先代古物為土人拾得光緒十六年該地居民  
韓文祥曾拾得赤金纒絲帶頭一重五兩餘余曾親見之又  
有人在該處拾得銅鐸余未親見容再採訪又去黃草山不  
遠在湖溪保內有古塚極大土人稱曰聞太師墳其說雖不

經然確屬古墓無可證明又古里渡南岸農人犁地翻出古  
磚上有字曰白水城磚余雖未親見見者甚多似非虛語應  
設法採取以資考證按白水即古彭衙同州屬之白水近之  
此磚曰白水城磚今之白水何年建置在此又何年移置於  
彼不無可疑彙識之以待詳考

建置志

明季而上人空地塞清乾嘉朝漸事邊要  
述建置第三

鎮坪古無考明正德中始設巡檢屬四川大寧尋改屬陝西未  
幾裁去清乾隆四十七年升興安州為府四十八年於鎮坪復

設巡檢相傳司署在今老街現基址無考嘉慶元年教匪姚之  
富徐天德等竄入境內據為巢穴邵陽魏舍人聖武記所謂老  
林是也經畧(額勒登保)將軍(明亮)都統(德楞泰)常川駐此勦賊

七年奏請將白土營都司弁兵全數移駐鎮坪築營堡於馬鞍  
山下分三門東曰朝陽西曰永安南曰鎮離城周圍長二百二  
十二丈東西徑長九十四丈五尺南北徑長四十五丈今之城  
池即其營地八年知縣任奎光承修都司署三十六間巡檢署  
二十二間把總署十二間今縣署之頭門大堂其舊也二堂東

西花廳三堂及兩旁房間道光十年又縣丞經權所詳請估修也計共一十九間按平利志載前陝西資政錄城在縣東南與

四川太平

後置城曰廳

大寧縣

今更名巫溪

及湖北竹谿縣天

牙相錯林箐深密要地也曰城在縣東南是鎮坪舊已有城世

遠人忘之耳道光四年移蓋洋縣丞為鎮坪縣丞分平利東南

廣化里之半為縣丞管轄地曰鎮坪首鄉曰三茅壩曰大小榆

河曰螞蝗壩曰平溪河曰澍河曰竹溪河曰石砦河曰文彩曰

古里渡曰大小湖溪曰白土嶺曰白硃峽曰竹葉關曰馮家營

曰水心坪曰百忍溝曰太平橋曰獅子坪曰八仙河曰牙河凡

二十一保嗣太平橋獅子坪八仙河牙河四保人民有賦役平

利之特性歸之不拒自此推翻奏案光緒三年縣丞謝敬莊籌

捐設三山書院官師教化始及書院額收銀課錢一百四十八

串八百文包谷課一百二十八石二斗六年復設積谷倉於各

鄉存倉市斗稻谷都一千九百九十石零八斗八升有奇包谷

七百三十石零三斗一升有奇二十五年大吏發款購谷倉置

署內實存市斗稻谷三百七十七石三斗六升有奇名曰常平



計倉廩共六間三十一年縣丞景興奉飭改書院為學堂閱二  
年成立創蓮戶捐棚捐屠捐以益之今學校田產經費視書院  
倍之宣統二年縣丞安澄抽廟租會館租並收黃蓮生漆各山  
貨捐辦警察令各保籌設國民學校三年次第成立各有的款  
先二年縣丞高景星倡捐開辦崇德女學校於城內今匿之矣  
前清舊制交通一端文武兩途各自為政凡遞送文件在不通  
驛遞之處文署則有鋪司或派專差武署則由塘遞例如城西  
關外曰塘壩因舊有塘鋪都司在白土關未移鎮坪時瓦子坪

汛設千總所置之塘也自都司移此鎮坪塘鋪曰竹溪河口曰  
謝家壩曰白土嶺曰牛頭店上四塘遞平利往來公文之人名  
曰塘兵又平溪河亦設有塘專遞八仙河往來公文均有房舍  
圍址入民國由部議變價無存現時官文書與人民信函我邑  
自民國二年始均由郵轉極稱便焉

民國八年我邑人民有鑒於法律規定遠道人民種種困難  
一切教育實業發展不能自由請願改鎮坪為縣經內務部  
核准奉大總統令公布施行原請撥還之各保經省署認為

無闕大要遂摸然之不知我不足一半廣化里之人民如何  
而可擔此無已之重負也雖曰已成事實而一切改縣籌備  
無從著手時至今日人民心理願請收回成命稍輕擔負噫  
不了局也

祠祀志

國之大事在祀與戎民視民聽服教奉神  
述祠祀第四

鎮坪向屬平利縣東南鄉之一鎮也有祠無祀聽民自便非有  
司所專自移都司於此為營於城內舊祀總署西有關帝廟為  
全營家廟民欲祀之弗得自主自設鎮坪縣丞而後於其署前

東南隅有衙神祠為其署之家廟又於塘壩西頭建龍王廟城  
隍廟為縣丞所祀之廟不過朔望謁之春秋祀典仍付闕如前  
清時萬歲龍牌奉於關帝廟遇朝賀或令節文武排班行慶賀  
禮東關外曰泰山廟民間香火廟也西門外偏北土地廟如之  
河南羅漢洞內奉玉皇釋迦佛真武祖師諸像民有祈禱咸往  
叩焉亦鎮坪名勝地也僊客騷人多會於此他如雞心嶺之關  
廟貓子廟之奉關帝平溪河之關廟大勝寨之關廟竹葉關之  
關廟類皆教匪竄此領兵大員勦賊屢獲神助建廟而祀之祠

也下比如大澍河之龍王廟興福寺老松半之祖師廟跳魚洞  
之文公祠石砦河之太極山文彩之大廟寺龍王廟三聖廟古  
里渡之禹王宮渡口之關帝廟佛爺砦之佛爺廟白土嶺之三  
聖廟白硃峽之玉皇<sup>廟</sup>三霄廟牛頭店之迴龍寺馮家營之天福  
洞大廟子之太平寺水心坪之玉皇廟均民間香火廟也遇祈  
年報賽建醮於斯鄉約讀法亦集於斯前之倉儲今之國民學  
校亦多置於斯鄉之廟即一鄉之公共場合也廟之祝無論為  
僧為道為俗恒一人焉幸無坐耗民食者肩相連踵相接雖由  
地方風俗靜好而亦貧而無資因之不敢妄自夸誕耳時至今  
日縣已改矣例如祀孔之廟社稷風雲雷雨各壇忠義節孝各  
祠又急待建立是所望於賢有司與地方之良者亟謀式憑焉  
庶乎民之視聽觀感有所寄矣

附邑有回教清真寺一在城東南隅天主教堂一在塘壩西  
宣統三年縣丞楊文濂負責為其購置黃洲會館一在天主  
教堂間壁武昌會館一在大教場西江西會館一在石門坪  
帝主宮一在興隆山

卷之二

賦役志

田賦身役國之要政污吏黠民轉展低昂  
述賦役第五

鎮坪為平利東南之高山老林無田可丈無戶可編在平利各里之民經勝清順康兩朝疊邀寬典減免賦役我地之民不與焉何也當順治康熙時在此實無一人一民出作其間因山未墾林未開為戶役全書所不載之地也乾隆中江南湖廣人來此漸事開墾來者日衆於是設巡檢緝捕盜賊仍不知賦役之謂何嘉慶元年教匪被大兵追勦竄匿於此以視山谷幽險林

箐深密而據為巢穴者也八年移白土都司駐此為營賴昭武侯楊忠武公遇春數年搜山之力始得肅清自有營後人漸繁多巡檢緝捕盜賊之力不足以資彈壓大吏乃議移蓋洋縣丞改為鎮坪縣丞益之以白硃峽竹葉關水心坪馮家營百忍溝五保之地為縣丞防地並分撥徵收地丁各項共正耗平餘銀十四兩六錢三分額外地稅銀二兩二錢三分三釐額外畜稅銀三兩二錢上項共銀二十兩六分六釐所謂地也丁也均徭也課程也民疇得而知之今之老戶江南湖廣人動曰挽草為

業又曰插草為標蓋舉未闢荒未升科時無賣主聽便佔領而  
言之也先時衙門文牘亦曰草糧又曰鎮坪草子糧蓋約言糧  
之輕如草賤如草子也以故胥吏因之巧取黠民借此售奸輾  
轉糾結低昂居奇其弊至不一致有由來矣甚望有人民之責  
者盍弗於此加之意乎現戶不下千餘家蜀楚人之來此興種  
洋芋藥材懋遷有無化居者又奚啻十倍上之故曰要地也亦  
三省邊防之要區也凡取於民而供國家省地方縣地方之收  
入應分別列表於后以明之藉資考鑒

按平利志載康熙末戶僅四百餘至今增至五十倍云以鎮  
坪比之此地康熙末確無一戶今千戶矣以視五十倍比  
之相去九百倍以上矣又曰嘉慶同治迭遭兵燹然猶繁衍  
於此休養生息之效可知也云考教匪之役鎮坪一隅實遭  
蹂躪十年有餘十戶九逃今所存者挽草為業之戶百不獲  
一焉然自移都司改縣丞而後四方之民歸之已聚族成邑  
又經百餘年來休養生息其繁衍更可知又曰顧開墾多而  
地利竭良莠雜而風俗偷有心世道者尤於此三致意焉云

云查鎮坪老林現已開墾無餘洋芋一項未經光緒庚寅之  
災人在高山種洋芋謀食種藥材謀衣自洋芋糜爛無種高  
山人一往而空藥材類如黃蓮黨參大起價值謀利之人漸  
由低山運糧至高山老林興種一切藥材每於歉收民苦乏  
食蓋緣於此至民之良莠無處無之風俗之偷與否又視有  
心治道者為何如初不關乎開墾之多而地利之竭也惟視  
去改造已十二年國家元勳夙願未遑民間生計凡所誅  
求實無項不取自民實無一事而與民攸關也况民不時而  
遇水火災侵猶不相聞問乎噫

現時鎮坪之額徵如左

地丁正銀五兩七錢四分三釐

三山書院銀九分六釐在內

祿米正銀一兩一錢六分六釐

三山書院銀一錢六分六釐在內

鹽課正銀一兩一錢七分四釐八毫

三山書院銀一錢七分二釐八毫在內

耗羨徵銀八錢一分六釐四毫

三山書院一分四釐四毫

平餘徵銀一百兩

附徵中學堂經費洋一百元

屠稅徵洋六百五十元

畜稅徵洋一百元

斗捐徵洋五十元

屠畜票費徵錢八十串

契稅徵銀一千兩

普通印花徵洋三百元

婚書印花徵洋一百一十四元二角

正銀如此雜項如彼民之擔負視前奚啻百倍而胥吏之手

續費交際費尤不與焉民之憔悴可知而知能不喟然又附

識之

人物志

國於天地賴人以立明德達才間世而生  
述人物第六

地方人物之盛衰端視官師教化之良窳我邑自設巡檢改縣

丞迄於勝清百數十年匪惟無掇巍科登顯仕即附青社食廩

餼者亦僅龍天祥涂丁峯陳炳新李正南羅萬象劉東昇方矩

劉照青吳炳杰楊煥文李培章賴淵文劉式金十三人而已匪

惟人盡質下不堪取材實官師教化遠莫能致所在官司土者

又非出身正途焉知教化興感之端良非淺鮮以今視昔能不  
慨然甚望有教育行政之責者盍弗於斯加之意乎臚歷任巡  
檢縣丞於人物之首以為後之官斯土者藉振興焉

巡檢

曹元慶 江西新建人監生乾隆四十八年任

陳紹琳 順天宛平縣人嘉慶二年任

邱 澐 江西甯都州人副貢嘉慶三年代理

戴文思 四川中江人監生嘉慶六年署

鍾尚綱 嘉慶八年任

吳崇執 江蘇武進人監生嘉慶十年署

李映棠 四川成都人監生嘉慶十年任

馮雲慶 江西沼山縣人嘉慶十五年署

張聯鶴 江蘇元和人監生嘉慶十六年署

曹繼庭 順天大興人附生嘉慶十六年任

洪文銜 江蘇上元人監生嘉慶二十二年任

周德煜 湖北江夏縣人嘉慶二十三年代理



金 幹 浙江會稽人監生嘉慶二十四年署

羅 沛 順天大興人嘉慶二十四年任

周嘉會 順天大興人監生道光二年代理

陳 梅 順天大興人監生道光二年署

郎發英 山西代州人監生道光三年署

章如蘭 江西南城人監生道光四年代理

縣丞

張 鶴 四川南部人監生道光四年任

徐廷琛 江蘇沐陽人附監生道光六年任

經 權 漢軍正黃旗人監生道光七年任

周嘉會 字理齋順天大興人監生道光十二年署二十二年

補後升甯羗州知州歲大饑公設法拯濟雖未能全

活然心力俱瘁

畢 瑗 安徽歙縣人監生道光十四年任捐廉補修城垣城

樓後升洋縣

劉文學 直隸長垣縣人道光十七年署

何謙 湖南新化縣人道光二十一年代理

金國豐 安徽桐城人監生道光二十一年代理

王耀 順天涿州人道光二十三年署

王栴 順天宛平人道光二十六年署

陸鴻疇 江蘇華亭縣人附監生道光二十八年署

范廷錫 甘肅皋蘭人監生成豐四年署

邱文煥 咸豐四年署

郭建本 字儒軒山西芮城人監生成豐五年任升鳳縣有善

政可稱

馬篤堃 山東歷城人監生成豐十年代理

邱景和 山西平陸縣人監生成豐十一年署

王金鑑 甘肅皋蘭人監生同治二年署聞警率眷避居三合寨

梁錫恭 廣東恩平人監生同治三年任惟簿不修民多非之

夏鼎 順天大興人監生同治十三年署

謝敬莊 字隣竹廣東平遠人監生光緒二年任以廉能卓著

升鳳縣去之日民多感泣

嵇承詮 浙江德清人監生光緒九年署

左麟卿 河南閩鄉人附生光緒十年任

沈文偉 浙江人監生光緒十五年代理

林 邕 福建閩縣人監生光緒十六年署補長安縣丞後升

鎮安縣

鄒仁鑑 四川華陽人監生光緒十八年署

周恩植 江蘇鎮洋人監生光緒十八年代理

景 興 字子德四川成都人文童光緒十八年任公之操守

人皆莫及

徐庭鈺 浙江人監生光緒二十四年代理

楊景春 甘肅皋蘭人監生光緒二十九年代理

高景星 山西人附生光緒三十四年署

安 澄 甘肅涇源人附生宣統元年署

楊文濂 福建侯官人監生宣統二年署

楊 連 四川成都人監生宣統三年署膽怯畏死罔知大體

仕籍

賴淵文 宣統二年歲貢籤分湖北補用縣丞

勇略

田大武 隨威勇公長齡征張格爾道光七年十二月二十九日張逆遁入喀爾鐵蓋山偕段永福胡超等窮追至山巔生擒之賞給確勇巴圖魯以守備即用賞花翎繪像紫光閣陞白土營遊擊遷江紹鎮副將

皮昌魁 咸豐三年入陝安鎮七年調勦安徽出力累功官至

千總同治二年入陝西營攻克渭南等處回巢以守

備用三年克復平涼首先登陴以都司用賞花翎又

以攻克清水屬回巢以遊擊用四年克復固原州賞

二品頂戴五年管帶親兵馬隊攻克紅河川老巢以

叅將用賞加銳勇巴圖魯名號七年攻克三不通回

匪老巢以副將用八年截勦永樂堡白吉原大股竄

回陣斬偽帥于彥祿以總兵用九年為陝安兵備道

呼敦右營馬隊幫辦總兵

袁得望 鎮坪營兵同治元年奉調出征平利堵截賊之地道

陣亡

耆年碩德

李正南 字卿臺家貧力學品正行端以道光庚子入泮至光

緒庚子為重遊泮水之年猶復講學不倦年逾大耋

而終

羅萬象

字易門聰穎異人無書不讀以道光庚子入泮至光

緒庚子為重遊泮水之年猶復課徒不倦邑之後進

無不遊其門者年逾大耋而終

楊敏

字功甫軍功歷署鎮坪營經制八仙河把總性廉正

恬靜好蒔花種竹與世無爭年逾百歲猶喜與後輩

談故事邑人曾於光緒二十三年公懇上峯題請建

坊以彰人瑞

節孝

陳氏 文童楊光明之妻經歷楊清忠之母年二十六守節

痛夫以苦讀嬰疾奉姑教子克成夫志同治元年請

旌建坊

陳氏 李榮輝之妻年二十五守節光緒八年請 旌

饒氏 從九陳浩之妻年二十九守節光緒十六年請 旌

王氏 陳惟貞之妻年三十守節家貧至不舉火人無間言

光緒十六年請 旌

高氏 賴元祥之妻歲貢湖北縣丞淵文之母年三十守節

堅苦卓絕卒至教子成學成名家道大康光緒三十

年請 旌

胡氏 從九劉美珠之妻年二十五守節旋因喪子失明壽

逾八旬光緒三十年請 旌

曾氏 涂可寬之妻年二十七守節光緒三十三年請 旌

蕭氏 監生張勝林之妻年二十六守節宣統二年請 旌

張氏 監生楊明璋之妻年二十九守節勵志堅貞教子成

名即節婦陳氏之孫媳貢生維時之母一門雙節良

非易觀宣統二年請 旌

徐氏 監生陳懷璧之妻年三十守節光緒三十三年請 旌

朱氏 監生王永錫之妻年二十六守節宣統三年請 旌

胡貞女 監生胡中運之女幼許陳國鼎為婚國鼎歿女往哭

靈旋回母家斷髮矢志終身不再字人雖陳姓撫有

族子至美繼其夫業女未一履陳氏之門其鐵石心

腸聞之令人欽仰年四十一卒於母家待 旌

選舉志

官師教化治術攸關涵濡默運計在百年

孝廉方正

羅武甲 宣統元年奉詔舉行孝廉方正制科縣丞安澄以貢監

生保薦孝廉方正

師範科舉人

劉式金 宣統二年由優附生在陝西優級師範博物科畢業

奉旨獎給師範科舉人並加中書科中書銜

恩歲貢生

涂丁峯 道光二十五年恩貢

吳炳杰 宣統元年歲貢

賴淵文 宣統二年歲貢湖北候補縣丞

楊維時 宣統三年在陝西高等學堂補習中學畢業奉旨獎

給貢生以州判選用

羅炳奎 宣統三年在陝西初級師範畢業援例獎給貢生

羅象賓 宣統三年由鄉試監生在陝西初級師範畢業援例

獎給貢生

鎮坪偏隅僻塞前代無考其被與選舉平利志所載者僅涂  
丁峯一人而已自科舉廢學校之制定士非此無進身之階

今列諸由學堂獲獎者於篇使後之人足覽焉

物產志 民財民力與物推移闢殖有道富強可待  
述物產第七

五谷者種之美者也我邑皆產之而吾民所賴以為食料大宗

者莫如稻谷玉蜀黍(苞谷)洋芋(馬鈴薯)紅薯黃豆小豆豌豆大

麥小麥燕麥暨尋常瓜果菜蔬數種而已木之類則有漆樹松

柏杉栗楊桐榆柳桑柘之屬其中以生漆與漆油為出產大宗

家蓄之禽獸與他處無異野獸之類甚繁而妨民食者莫如野

猪土猪花鹿數種其他山禽不與焉藥之類所產實多而吾民

利賴以資事畜者莫如黃蓮黨參當歸大黃花椒為最夥現時



亦宜木棉花紅者為宜如有人專力提倡亦闢地方利源之一  
大善政也我邑天然出產最美最富者莫如石棉煤炭二宗石  
棉之最美者據化學家考驗以石砦河所產為世界第一大澗  
河平溪河二處均有尚待開採煤分四種砂煤燃燒力厚油煤  
可供銅鐵工師之用石煤火旺而不免硫酸氣之薰人糠煤（火  
車輪船所用類此）則供作食燃爐之用亦佳產也產之地不一  
高山興種藥材之地無處無之其脈之旺要不可以道里計惜  
船舶不通不能運往鄂滬亦大憾事也

### 卷之三

#### 風俗志

人情習尚與時變化端視士夫相為轉移  
述風俗第九

民俗樸陋服田力穡無待督課猶有先民之遺風焉然界隣蜀  
楚民雜五方其習尚亦各有不同蜀人多業農楚人多貿易蜀  
人信巫家有人患病必請巫禳解名曰打保符家道順暢亦請  
巫扮演慶神名曰跳耍神楚人好釀金迎神賽會為酒食是議  
無論貧富喪葬必請火居道師（在家俗人）敲鑼擊鼓呼天喊地

醜態百出猶以天數多寡為定人子能盡孝心與否嗚呼愚矣

余家每遇喪葬一本諸禮不信異端人咸私議而非之蓋緣讀  
書人少見理不明相習不察而安之耳然風俗與時為轉移習  
尚亦因之而易自余所聞見者已數變焉有時尚阿諛以逢  
官府出入衙門為榮鄉人仰之慕之甚有尤而效之其技止於  
指揮書役說關了事從中取巧而已有時重使氣不肯屈服於  
人其桀者甚至把持地方武斷鄉曲官之懦者任其作為民幾  
不堪命矣其志在報平日私忿而已與他取巧又微有辨焉總  
之非善類也有則足以敗壞風俗無則地方歸於淳厚人皆安  
居樂業豈不懿歟

兵歲志

妨民之事惟歲與戎如何而可老死弗聞  
述兵歲第十

按平利志載平邑萬山襟帶明末流寇盤踞多年其殷鑒也又  
云嘉慶初教匪竄伏深林大兵追捕而後定云云查平利所屬  
稱為高山者蓋指鎮坪而言也其他東西北西南各里皆平行  
無大山惟東南廣化里一區則似之明末流寇盤踞多年實在  
鎮坪一帶因此去蜀楚近彼追此竄此追彼竄以山高林箐為  
逋逃藪嘉慶教匪之役大兵在此搜勦八九年之久他處之賊

肅清而此仍有餘孽未盡者職是故也謹按魏默深聖武記所載關於鎮坪之兵事者摘錄之以資考證

嘉慶元年教匪徐天德等由太平入陝分犯安康平利二年十月姚之富等出平利明亮德楞泰追之賊狂奔以劉君輔之兵阨雞心嶺斷其去路折回與大軍迎敵明亮等以精兵陣峽口伏於左右擊斬無算賊保險不出乃佯散澍河口之兵設數伏賊果趨北路伏發斬賊數千餘賊分竄官兵追躡之繖子坪賊復合為一三年五月明亮馳赴平利與額勒登保勦楚賊於鎮

坪賊奔太平四年四月陝賊張天倫由平利窺竹谿欲犯湖北而高均德等亦由太平紫陽趨平利犯楚境與官兵戰敗復折回陝五年八月明亮孫清元與紹祖夾擊徐萬富苟文明二賊賊由鄖縣竄陝進敗於平利之汝河十二月高天升樊人傑二賊奔平利六年正月賊高天升入陝徐天德留楚將與陝賊合官軍阨吉陽關斷其交結楊遇春與楊芳邀冉賊於平利二月漢南賊苟文明等東至白土關南趨鎮坪德楞泰分兵追躡而自繞二郎壩待之五月七十五追敗冉天士於鎮坪之大澍河

入龍苟二賊竄平利辛聰冉天勝亦向白土關六月參讚議會  
勦於平利八月德楞泰令賽冲阿等追賊於平利斬龍紹周於  
盤龍山額勒登保遣穆克登布敗賊後隊於平利七年三月老  
教匪樊人傑等趨陝穆克登布迎擊於平利十年額勒登保入  
川留兵千餘聲稱經略大營屯鎮坪以防川楚八年四月德楞  
泰奏以豐溪平利餘賊楊遇春搜勦九年正月餘賊竄界老林  
諸軍會攻賊奔化龍山將士裹糧窮追八月賊黨趙洪周斬苟  
文明出降各路肅清九月班師

自是而後同治初而有髮逆郭逆之警報傳來郭逆則由八仙  
街經曾家壩而至平利髮逆由竹谿而至平利邑之人倉皇逃  
避上寨上硯恒數月不得休息幸皆未入邑境實遭蹂躪元氣  
未受捐傷越五十年而有宣統辛亥吾秦改革之事延及於斯  
其經過情形事實有邑人賴子子麟反正事略亟錄之以備遺忘  
宣統三年九月秒隣匪蜂屯蟻聚入境劫城都司朱燾力防堵  
之暨聞湖北四川本省本府均已反正始挂冠去其時安康人  
吳樂來鎮據文篆王坤山來鎮據武篆偽稱奉檄視事任意開

用常平義倉及各屬積谷糜耗過半旋又勒索兵餉搜括無遺  
蹂躪不堪慘號之聲達於四境幸興安防禦使高慶雲派張應  
龍以孝廉柳應元等佐之驅除匪黨民命稍蘇惟仍聽吳王二  
人盤踞無復秩序任意妄為至民國元年四月都督委縣丞朱  
攀雲至鎮坪署文篆民始復見天日乃高慶雲又派杜春山來  
鎮接武篆其狼貪暴戾較王坤山尤甚以朱縣丞為机上肉覷  
邑地險峻遂據為巢穴招納川湖亡命自稱重整復漢軍大統  
頗意欲先戕官後擄民紅旗招展竟設障天朱縣丞幾遭毒害  
逸入山寨得免天憐鎮民都督檄南山善後司令陳樹發派叅  
謀楊仲傑帶軍隊及各保團練應時而至一戰克捷斬馘數十  
杜逆見戰不利預同軍師逃去至茅壩河之瓦子坪為團總康  
忠國槍轟斃命奪其軍械偽軍師楊某亦就擒其餘偽副官營  
官哨官紛紛逃竄各地團練圍拏送營審辦脅從者赦之綏營  
兵散之其黨遂平翼年八月四川第五師師長熊克武謀第二  
次革命雄居川東陝西都督張奉袁總統令檄秦軍二師師長  
張鈞援川取道鎮坪邑中曩稱瘠苦况數遭兵燹又值克荒供

支一切拮据萬狀殊彼時兵士性質來則立索供億去則毀損  
器物勒索夫役任意無度稍違即鞭扑隨之道殫相望慘不忍  
覩父老鮮不受其毆詈男婦罔不被其凌辱民間望風狂奔十  
室九空甚至搜林捉拏雞犬皆飛雖官吏鄉團亦無如何後到  
者遂無從籌措供給僅有柴米而已時縣丞高天斗力慙心傷  
日夜咯血當道者以玩抗兵差罪之並擬戮之鎮父老奔轅號  
籲願以身代始克免死撤任吁可畏已三年三月以白匪竄陝  
故張師長復奉檄旋師其兵威勢較前尤張不惟行李軍裝需

人擔負而因師婚娶及掠誘之蛾眉粉黛輩亦需扛抬稍形遲  
慢血肉橫飛蕞爾微區以滾滾而來者安得源源而去叱咤聲  
號泣聲沿途不絕天慘地愁噫鎮坪民之不幸抑何使之至於  
此極耶况時至春耕民皆服役孟夏秋始過竣斯時豐草滿山  
耕種已無及矣乃猶倉皇播植涕泣耰鋤幸造物仁愛夏無驕  
陽秋無苦雨雖未必滿篝滿車而其實離離謂非天之所賜也哉  
民之受兵害者既如上詳述之矣而兵之駐防如此者又不可

不記以見邊防之重要嘉慶七年經經略大臣額勒登保奏請

以白土營都司弁兵四百三十六員名全行移駐於此為鎮坪營平利續修縣志時鎮坪營事俱不載今營卷無存無從查考謹就所可訪聞者言之營之兵自嘉慶十二年按次裁撥歸併至咸豐十年實存官兵一百五十六名光緒十六年復裁至一百二十四名三十一年又裁至七十八名八仙河瓦子坪兩汛暨各塘兵在內其都司名姓多不可考就所知者附錄於此以殿之焉

馬仕相 鍾虎种 李世珍 李世發 廖世光 段永福

蘭呈瑩 薩保 張夢銀 徐日昇 王兆傑 哈成龍

楊春華 蕭遇海 劉秉忠 楊志進 王忠美 丁添祥

魚文陞 蔣光樓 李正安 袁世佐 劉洪勝 向定榮

胡成福 朱燾

我邑荒政未設縣丞以前無考自設縣丞而後道光十二年霪雨為災秋收全無十三年大饑賑救無濟人相食死亡遍野掩埋不及民之有力者恒於五百里外運糧或往就食至今每遇長老言及猶有談虎色變之概其後光緒十五年己丑秋雨淋

滴高山洋芋潰溢罄盡十六年春大饑居民轉徙流離餓殍載  
途雖縣丞林邕請賑發倉烟戶僅餘三分之一至今元氣未復  
洋芋仍然潰溢二十二年秋雨延綿自七月十四日起至九月  
初二日止八月二十八日東關外及茅壩河之中心場石砦河  
大澗河白土嶺猛子岡同時山崩河水為之不流其受災民人  
縣丞景興前後皆彙報上憲請恤二十三年大饑較十六年尤  
甚民多逃亡餓殍載途谷價昂貴每石值銀十六兩之多至民  
國三年因兵差過境民苦力役有誤農時以至缺食幸有竹米  
以濟其荒錄張縣佐漢京進賦竹米拯饑紀事

民國三年甲寅夏糧食奇昂天作價富僅自給貧屢空三農庚  
癸呼嗟訝山國運輸既不通發棠散粟難為功菜根嚼盡婦子  
泣嗷嗷仰屋呼天公天高聽卑測然憫趣使山靈速籌賑山靈  
無計指困助一心呪竹莫成筍萬山高插霄篠蕩千萬條貧簞  
谷裡春光老龍頭鳳尾皆折腰兩歧穗壓漁陽麥大熟豐登未  
獲苗於時比戶累日不舉火夥頤相驚爾約我垂垂竹粒天餉  
貧北斗南箕難量簸女挈橐兮男攜筐遵微行兮陟高岡取之



無禁任挹注炊以為飯甘復芳朝打糧暮春粟朝朝暮暮入山  
曲鼓腹人人泯怨咨直至青黃相接續吁嗟兮我聞竹實鳳凰  
食分惠災黎咸飽德泰山鬱律奪天工水毀木饑窮推測金精  
玉屑盤中粲不羨胡麻福分難紀瑞濡毫懷禹迹天宮雨粟合  
同看

志者史之一也縣有志猶國之有史所以傳信也豈可以地偏  
而泛世遠而誣邑小而略哉鎮坪本平利縣丞分轄地余蒞斯  
土置縣始一年固無志之可言然備詢地方風俗人物與夫一

切興革損益凡所以裨政教者概寂乎無聞余怒焉憂之適省  
憲劉兼座於政治修明之暇謀續修陝西通志令下各縣採訪  
凡舊有縣志者先賚局以備考核其無者亦限纂鄉土志以聞  
於是乃延邑舊劉幼賓直刺秉筆而編次之分為十篇嚴於一  
字文約事賅體精旨遠凡所紀載悉關國計民生人心風俗豈  
僅以文哉確乎可以傳信不因地偏而泛世遠而誣邑小而略

也官斯土者得是篇而詳覽之進與都人士講求禮義維持風  
教以底於化行俗美治隆召杜庶無負

兼座是舉之宏願也夫余樂而書之於後

知鎮坪縣事壽春袁家聲樹臣識